

萬曆武功錄

萬曆武功錄卷之十

翰林院添註待詔瞿九思著

東三邊

土蠻列傳下

土蠻兒伯言。蘇把亥。黑石炭。銀燈。五萬餘騎。從撥刺
兔治行。往河西南兀魯班。蘇喇哈。聲欲略寧遠前屯
衛。因奪山海關。十月。謀者馳滾兔營。得土蠻近狀。方
與伯彥等五萬餘騎。欲從刺母林入遼左寧遠間矣。
夷婦孫則又言。土蠻到土列根。撥刺兔行。欲入黃土
嶺。一片石。東到山海。中前所。旦日。竟從敖木林止壁。

燕河路。熬木去遼左。寧前可二日。去薊鎮東西可五日。邊吏皆陳灤河以備虜。時遼陽地震。復雨雹。大雨如注。居亡何。虜自苑兒營入。已自錦川入。以四萬餘騎。布十里許。叅政使李松亦更戎衣。臨兵。於是遊擊將軍黃都。卽擁精兵馳狗兒河。轉戰。斬首一級。奪獲馬三匹。都復與遊擊將軍許汝繼大戰石河墩。斬首二級。奪獲馬二騎。虜還走山莊巢。列陳二十餘里。得出塞。先是薊鎮總戎戚繼光馳中前所應援。大司馬方逢時以督撫梁夢龍臺御史周詠御史安九域議請。上念兩鎮將吏協力却虜。功同。斬馘。賜梁夢龍

大紅飛魚紵絲衣一襲。金四十兩。李成梁。戚繼光。金三十兩。表裏亦如之。繼光加少保。周詠。張夢鯉。皆賜金三十兩。二表裏。遷夢鯉秩一級。李松。金十兩。遷秩一級。楊紹勲亦如之。黃都。金十兩。祁棟。金五兩。其十一月。土蠻黑石炭聚黨二萬餘人。欲略廣寧迤西。其十二月。黑石炭銀燈一措委正帥三萬餘騎。約土蠻略遼東廣寧。而土蠻志尤在義院。以報薊鎮之役。誠毋犯遼。頃之虜騎遂合營。欲攻廣寧。花桑谷猶豫未決。於是與速把亥合營。移遼河。止壁邊外紅土城。詳言欲入海州。以牽我師東顧。又以零騎一犯錦州大。

鎮一犯義州大靜。以覘我虛實。土蠻爲人最屈強。盤
牙遼左邊外。兩河患虜。錦義爲尤甚焉。通近虜巢。又
塞外山林設險。易於捕伏。哨探旣難。追逐不便。異時
總戎李照王道治。死此樹下。時按察使李松。分守使
張崇功。洪濟遠。分巡使周于德。太僕少卿喬應春。監
軍。十道竝發。而大將軍李成梁。捕伏大清堡。乘勝出
塞。二百餘里。直抵大營。擊破之。斬首虜凡四百七十
一級。奪獲橐駝馬牛羊器械亡筭。我官軍傷者凡九
十九人。制置使梁夢龍。使使奏捷。以正月二十二日
公卿以致詞稱。賀祭告郊廟。上有詔。後邊功

奏捷俱先議賞其應陞等項俱候勘明 奏行是役

也 賜李成梁大紅蟒衣一襲還同梁夢龍金五十兩表裏四之周詠金三十兩表裏二之周于德高自新朴栗卿秦得倚李成材孫守廉李平胡李得全熊朝臣曹簋楊燮蘇國賦劉承武蔣位金二十兩高自新李松張崇功洪濟遠喬應春雷以仁徐枝黑雲龍金十五兩周之望劉崇正涂廣黃廷鑰張相查大受李成林金十兩于國母承先楊栗陳文治金五兩本兵調度有功方逢時金三十兩表裏二之吳允王一鶚金二十兩表裏一之司長皆 賜金十兩辛巳正

月王兀堂殺我寬奠靈陽語在王兀堂傳時土蠻又聚兵十萬聲言欲略開原不可則此略建州伯顏罕策已決矣會忙金兒阿只孛來亦擁四千餘騎屯大寧以元日焚紙約與土蠻略遼左我課者訶之或言土蠻灰正在捨刺毋林或言在黃河黑河或言在遼河上稍於是遼東廣寧迤東西苦兵甚矣其六月御史于應昌覈鴨兒匱紅土城功併請詔曰李成梁累獲奇功着以原任都指揮同知併功世襲伯爵給與誥券其七月土蠻調黑石炭蘇把亥正哈亥惡卜各素已調好趨家達子及大委正約與略廣寧迤西

山海迤東。土蠻男百樣。又約諸虜畢聚老河。厰房。乃使栢三戶往安灘營。而西虜黃達子亦往土蠻營。土蠻方移壁一克。磕力把漢。磕力與速把亥祭。肅定以八月初十日直擣寧前期而不至者。罰治後。土蠻以酋長老思罕未至。與諸虜改約。至二十日。夷使以檄速之。又不至。西虜至者。唯麟古互一枝而已。土蠻不得虜不敢入。九月虜始張旂志。持鈎杆跳驅與水堡分道而馳。馳東窪河者。備我師東壁。馳寧遠者。備我師西壁。馳關廂巷者。圍我城堡。是時備兵使李松躬帥偏裨三面當虜。至東關大戰十合。南關八合。東關

又六合虜不敵潰圍北走我師追之從天砲臺出邊
久之土蠻黑石炭打喇罕以長最爲耳日多持皆攻
城具復南馳克兒裡以遼左失利欲犯山海關一片
石黃土嶺大毛山先使諸騎分布卜里兔眼及群澤
落兀素卜里兔眼去大寧東北可二百餘里群澤落
兀素去大寧東南輕騎可半日至所在皆唼唼聲也
先隆慶初花桑峪失利土蠻僅以身免向不敢窺山
海西今漸東逞從山海走界嶺口首尾略盡矣時薊
鎮總戎戚繼光亦分部燕河臺頭石門山海四路備
土蠻御史劉光國言兩鎮諸臣未盡協心似非長策

給諫王致祥言六可憂。書多不載。時薊鎮南兵厚糗
糗與北軍異。互相詬病。至謂不慣披戴。難當虜鋒。致
祥恐兩軍不睦。利其敗而實其語。南兵卽死。柰疆場
何如。欲調和南北。請着爲令。以分之。在薊門則思灤
東爲受敵之衝。在遼左則思寧前爲虛弱之病。皆深
溝遠濠。堅壁而守。以隻虜不犯。爲上功。如一入遼則
薊門大將軍。軍石門。出銳師以撓其勢。如入薊則遼
左大將軍。軍寧前。以扼其吭。若率然在山。虜將不戰
而屈。久之。虜騎從慶雲堡入。裨將吳尚忠。擁精兵馳
中固城。會虜攻關。廂急。偕遊擊將軍王維貞。令鎗棍

火器竝發。虜始懼。犇馬家寨。而備禦使高雲衢、李宗召蔣國泰、益堅、備鐵嶺城。適裨將黑雲龍、馬世龍、卽梅兵至。虜果馳鐵嶺上。往北走。於是黑雲龍還歸中固城。而副總戎孫朝梁及叅將孔東儒、楊伍典、備禦高雲衢皆尾虜。邀其歸路。虜倉卒反走。苗頭向城東井朝寺。我軍四面竝發。斬首虜三級。奪獲盔甲二頂。弓箭三付。腰刀三柄。馬七騎。陣亡百戶朱國戶、蒼頭軍陳得時、漢馬死者二十七匹。傷胡承恩等六十六人。馬八十五騎。至十三日。復攻關廂。我救兵四合。更迭進戰。虜始夜投殷家庄去。已出塞不及追。無隻虜。

遺矣。顧有媿此功者。流言虜把薊門。京師鬬沸。民
擄家赴安定者。爭門而入。多蹂踐死。通州民爭舟而
渡者。多漂溺死。玉田散走林薄。多饑寒死。村落年少
乘閒鹵掠者。不下土蠻。御史王國行部按之。數日而
定。乃虛聲自建昌至也。至十月。虜騎犯義州。深入大
凌河右屯衛。其明年正月。土蠻黑石炭以麟金兒爲
鄉導。與西虜哈卜慎。麟古友。往長昂營。祭天。聚兵四
萬。壁廣寧外邊。居亡何。虜騎犯錦州。深入松山。杏山。
小凌河。殺毆官軍。其二月。抄花使部夷哈喇那亥告
漢言。土蠻男卜言台周。腦木大。黃台吉。克石炭。大小

委正以兒鄧矮兔拱兔抄戶兒陳兵女只罵火屯已
竝馳赤納哈氣兒詳言略海西建州欲出不意犯廣
寧塞然虜多往騷達子營竊盜馬牛羊矣藉藉皆有
口自是後花大亦使火力紅道言黃台吉克石炭大
小委正欲斬關而入略廣寧東西給諫王致祥見土
蠻深入凌河焚略幾盡其視遼民蓋藏不啻原圃廼
奏薊鎮亟調援遼兵馬以資夾擊宣大亦戒青把都
竊發以防未然久之土蠻黑石炭擁衆馳襖郎兔休
舍成梁從義州大寧堡出邊行四百餘里直擣虜壁
擊破之斬首三百四十三級奪獲馬四百三十騎盈

甲器械亡笑我蒼頭軍亡馬鋒等四人傷張永官等
七十四人漢馬死六百八十騎捷至會 上大閱喜
甚祭告 郊廟賜爵賞金幣如禮語在黑石炭傳自
後土蠻益懷不逞與速把亥阻河爲險以避我兵出
沒東西毆殺以報其四月黑石炭以兒鄧小反青卜
言免阿夷聲言略遼瀋海州及廣寧虜騎萬餘從長
安堡直走新城南境我兵李守忠渡河守備使劉崇
正追至堡東可三里許虜以二千餘騎挑戰我師大
敗千總陳鵬把總潘汝楫蒼頭軍曹義等死者凡三
百一十七人傷楊四維等凡一百五十八人漢馬死

者。凡四百六十四騎。我師斬首虜五級。奪獲馬二十
八騎。御史于應昌使備兵。使張崇功廉之。實殺略遼
左男婦凡二百九十八人。傷一十九人。鹵馬牛驢凡
三百七十九頭。糗糧九百九十一石。焚燒室廬凡二
百有六所。以書劾奏。上詔革曹鑑張奇功任。并崔
吉。吳胤祖下御史逮問。其九月。虜騎五萬從謝海深
入山圖舖。白廟兒屯。見屯堡備兵至。周詳盡驅馬還
歸。我師聚而追之。虜以萬騎接戰。漢兵萬弩俱發。擊
殺甚多。虜亦發鳴鏑射死我軍李雲等七人。馬三騎。
其十月。土蠻大會速把亥。謀入。因遼水深不可渡。馳

白雲山寺邊可三十里。圍廣寧城不克。復從鎮安鎮靖入邊。攻圍山堡。盤山驛。及十三山驛。已攻義州。殺略軍民二十二人。鹵六人。糗糒二千一百有八。石焚燒廟宇二座。草廬五百四十八所。車七輛。我兵斬首虜一十八級。奪獲馬四十二騎。官軍張勲等被傷者五十二人。漢馬死者五十二騎。虜皆從大清。大靖出邊。其明年正月。虜從靜遠堡。九臺入。已從榆林堡入。瀋陽城南。渾河西岸。已從長勇堡。大臺南北二空。深入渾河東岸。時土蠻欲略廣寧。迤西。伯產兔。又聚兵拾刺塔。欲略廣寧。迤東。會王杲男。阿台。阿海。報虎兒。

罕而爪兒兔爲速把亥報開原青把都又略速把亥
卜言台周大會黃台吉以兒鄧青把都伯言兔大小
委正耿華兒以克反青馳遼河及瀋陽海州廣寧關
門迤西送把都莽官大莽骨塞乘機略寧前錦義其
二月炒花請土蠻往窰臺子報速把亥之怨其九月
西虜哈不愼聚兵二萬餘騎大會土蠻及大小委正
三衛屬夷聲欲略寧遠山海桃林口山海關叅將王
守道請治深溝固壘以衛關外居民頃之小委正師
萬餘騎馳廠房走山海關關上兵出中前所延綏兵
出前屯衛東虜大逞克世等擁三萬五千餘騎馳老

河水汲欲略山海關。或一片石而一克。灰正馳惡力。委正亦會青把都所欲略山海關。亦如之。廼決筴以三萬五千騎入關。行劫略。以二萬餘騎堵口子阻絕。遼陽弗得通。如入關。亡所利。從此略前屯衛。於是村落居民盡遷徙入山海關。而大將軍楊四畏、備臺頭石門東協副將軍楊紹勳、中協副將軍史宸皆張三軍東移。聽援遊擊將軍戴朝弁檄把總李幹兵預設鋼輪火炮。備一片石。指揮傅國忠、備巷口。令千總張蘭出寺兒谷。叅將王守道出關外。則西虜哈卜慎已至大寧城矣。頃直往塔盤。至敖母林大會。大小委正。

先是虜騎略前屯山海亡所獲廼馳罕赤保哈止壁復從前屯衛三山營入而謀者張興三曹文勝何的生道逢虜興二獨中流矢死於是守道提裨將崔大相施奇武楊國賓張便兵八百有八人遊擊杭大才提裨將盛莊王爵劉彥兵一千四百三十有三人皆舉烽直走老軍屯西李家山臺鑒虜虜下馬穿甲我輩亦下馬依山爲營設置火砲虜廼用白旂每旂引數十餘騎分道竝馳我師火砲火箭三眼鏡竝發虜皆還走已更番衝鋒大率增萬餘騎王守道杭大才卽鳴大砲虎蹲砲自午至酉大戰五十合斬獲大相

當會莫虜還走一里許止壁我師被圍甚窘困守道
乘夜半解嚴躬帥軍士執刀鎗器且掘壕用廩運土
壕深四五尺將火砲設置壕外我軍擐甲拒守旦日
虜廼以一枝阻前屯以一枝犯一片石迤東新堡去
關可五里先是遊擊將軍戴朝弁都護霍貢備一片
石烽火嚴甚人畜又皆內徙虜亡所獲鹵呂家庄男
子呂信等七人傷朱福一人燒李澤車一輛趙世臣
房一所驢二頭因使七八騎衝南水關監門張蘭以
矢石擊去皆還走虜亦射中我軍王大功已復走四
騎追蒼頭軍林見至東嶺賴關吏戴邦彥救免是日

守道使陳良金夜半出營告變。亟徵兵。有副總戎楊紹勲。以中軍盧光先兵至。叅將王國翼。以中軍汪洋兵至。遊擊麻栢。以中軍李從善兵至。叅將錢國用。以中軍李如梓兵至。遊擊劉遠圖。以中軍李爵兵救之。四面合陣。主事王邦俊趨諸軍出關。關外虜勢強甚。我師竝休舍丘家山。明日虜折居民門板蔽箭。益衝鋒。守道兵殊疾力戰。火藥弓矢幾盡。卽以悶棍潰圍而走。楊紹勲馳救。舉放號砲。守道知爲援兵也。亦鳴砲響應。合營接戰。破之。斬首虜一級。奪獲達帽套靴達刀木鈎鈎鎗護胸皆一事。達箭三百八十四枝。回。

箭二十六枝。於是叅將高如桂遊擊王鳳鳴以一軍軍黃土嶺。叅將賈應隆副總戎張玠以一軍軍駙馬賽界嶺口。劉家營遊擊路宰王添職都護馬魁武以一軍軍山海關。虜望見大兵四至皆還走。臺御史翟繡裳督戶部郎程宗伊主事王邦俊治糗糧率永平卒李一言轉餉不乏。恐虜復有它圖使叅將錢國用王國翼備信地。紹勲備前屯。備兵使成遜馳臺頭路。軍居中。虜竟東走。前屯衛由沙河站高臺堡去邊頃復以五十騎從大清堡奔白土溝。備禦栢朝翠追逐至雙壕斬首一級。奪獲馬二騎。自是後給諫馮景隆

劾奏寧遠伯李成梁。上從大司馬吳允議。詔曰。

邊事重大。將材難得。若大將盡忠奮勇。替朝廷出死力的。却誤信浮言。橫加抵斥。反不如避事偷安的。可免訾議。這等是非倒置。功罪不明。何以服人心。作士氣。李成梁封爵照舊。益加策勵。勿以人言介意。有負國恩。馮景隆輕率妄言。姑調外任。其十月。虜騎從古北口入。先是諜者由松山始至背陰障。凡九撥。一旦虜倣卽鳴砲傳檄。而松山將袁祥不行遠探。虜得直走山海關。過歡喜嶺。於是王守道卽提裨將崔大相。施奇武兵五百一十五人。杭大才。提裨將盛莊。

胡順華兵八百五十五人出關。而把總楊國賓、張便、王爵、何寧、徐桂並馳南北水關。虜廼帥千餘騎衝一片石、掠人畜。從南山走犇石門路。我偏裨戴朝弁、麻栢、霍貢路宰並發火器追急。奪獲周安、李真等一百三十三人、牛驢二十一頭。已虜千餘騎。衝南北水關。把總張蘭、王爵、張應期、丁科疾力戰。虜大敗。鼠竄南海口。旱門角山行至三道寺。裨將譚堪、趙愷、何寧、徐桂卽以郎機、火箭、快鎗、石砲拒堵。而虜騎之衆亦增至三千餘矣。虜執鈎鎗、短刀衝關廂新城。而會新城北面未告成。虜遂從城北抄入。殺我百戶陳守仁。及

軍餘徐奉、呂勲亦被一鎗幾斃。守道衝鋒奪獲達帽一頂、氈口袋六條、鐵鈎鎗一十三桿、盔纓一根、達箭三十九枝、捕斬相當。遊擊將軍張秉忠馳救虜，竟還歡喜嶺已，復以三百餘騎奔一片石。我鋼輪石砲甚備，虜不能駐。始虜在關外，殺我張貴等三人。虜我孫虎等六十五人，傷我譚昇等三人。奪羊豕牛騾驢以百數，糗糒七十七石五斗，燒燬土平房一十九所。車一輛，俱論指揮林樹勲以法由收保之。合弗早圖也。時遼東人梁才亦被鹵，久之竊胡騎奔關。途中軍崔大相及蒼頭軍詹二、詹二奪被衫布袋，奪所騎馬梁

才以裸身不可歸。因賂詹二錢。一得贖衣被而去。居
亡何。虜騎百餘殺略關外。鄭家庄人史宸卽擁戴朝
弁路宰霍貢。高如桂。王鳳鳴兵出塞。虜以東馳八里
舖。老君屯。餘黨或竄入前屯衛。我師追迫。虜皆從古
北口出邊。漢使黑倉。訶之至丙兔打兒漢營。訶之則
土蠻之弟小打兒漢。董狐狸之男伯彥孛來并死。關
吏刃矣。哈不愼兵卒被擊傷尤甚。於是青把都往專
難營。藉兵又逞仰二奴約土蠻略鐵嶺遼瀋開原。土
蠻業已刑馬祭旂纛欲犯三岔河。及遼陽爲速把亥
修夙昔之怨。廼引男上言台周大會黃台吉以兒鄧

青把都土妹。搢臣大小委正。反青莽古素台吉。塔塔兒百戶。莽惠拱兔。煖兔。樊兔。逞把都已。又會五路男。扯勞亥。速把亥男。把兔兒。及花大抄花老撒卜兒亥。牧馬善養木。大入遼瀋海州。其十一月。虜以五人捕伏冷家溝。殺道上行一人。馬一匹。劉崇正使把總賈待聘。高尚仁。陳衛國。馳冷家溝。捕獲生口脫羅。復追亡至紀家臺。乘雪襲蹤。堵截虜一人。從白土溝出邊。栢朝翠追逐至皂洞山。去邊四十餘里。劒斬之。虜亦傷我兵一人。馬一匹。其十二月。虜騎三萬榆林堡入蒲河。及永安寨。大寧諸堡。叅將王有翼。擁精兵轉。

戰益疾力。擊破之後。先斬首捕虜凡四十二級。奪獲馬八十一騎。我蒼頭軍死李化等二十六人。傷官軍李平胡等四十八人。漢馬死者六十五匹。先是。備禦使何應魁。使謀者錢仲美等七人。由長勇堡出塞。馳長山。去邊可一百里。有虜騎四五十。從西北來。望見漢使。輒前接戰。漢使殊疾力。斬首虜五級。奪獲馬八騎。虜亦傷我兵一人。馬三騎。已。復使降夷我羅奈等三人。馳養善木舊遼陽。虜營火光燭天。我軍使降夷卜兒寨。勾登向化等十二人。馳伏規革兌。去邊七八十里。道逢虜八騎。轉戰。斬首二級。獲生口。盃措打兒。

漢一人馬一騎。虜亦傷卜兒寨一人馬一騎。而是時。長昂董狐狸欲略前屯錦州。東虜速把亥灰正西虜哈不慎會土蠻及腦毛大欲略三岔河東遼陽瀋陽迤西并金復海蓋東虜銀燈花台吉欲略遼陽東西以故間諜甚密。其明年正月。漢復使降夷卜墩卜兒寨乃六果羅太忒谷魯之東等五十二人由義州大康堡出邊行。至哈老柰掩伏。而乃六果羅太等行至虎塔字羅相去卜兒寨既三十餘里。虜以七八騎衝鋒。乃陸等忽轉戰。虜之東捕獲生口打兒塔一人忒谷斬首一級。是時三岔河尚未凍。東虜大委正小委。

正治兵。日夜候土蠻至。土蠻先使先大兒子伯彥太主數萬騎。治行。令人持口袋一條。及鈎杆鐵斧。口袋用以乘土。至冰上墊路。然土蠻微指。必欲埃河凍實。然後大入遼陽南四衛。不則入廣寧東西矣。邊吏聞謀者言。腦毛大滾。兔欲略寧遠。迤東西。而董狐狸。獐兔欲略前屯。迤東西。長昂。董狐狸。又欲略山海。迤東西。皆有狀。其正月二月之交乎。是月土蠻部一克灰正滾。兔總萬餘騎。擇精兵五百。馳黃土嶺。阻絕漢使往來。把亥。灰正。又陰與滾兔約。以四千騎。佯言行獵。誘遼東人出塞。撲殺之。如弗至。請以數千騎。大入寧

遠二者必居一焉。居數日。土蠻大男伯彥太主及部
夷一克委正。聚二萬騎入遼東。開原而小委正反。青
亦治盔甲。鈎梯。擊錦義城堡。把兔兒又至土蠻所。言
我無年命。姑徐徐。今弗至。是時把兔兒抄花花大。卜
言顧方牧馬。恰亥額力素以爲新月兒上。乘此騎馳
舊遼陽。謀者來告曰。西虜欲自無冰者入。東虜欲從
有冰者入。居亡何。黃太丹恍忽。太竟馳養善木。東虜
短弓兒。奈回兒。灰正。馳黃泥窪。驪城。而土蠻黃台吉
亦馳陽場河。始蒲河之役。殺略石家衝。馬祥溝。李馬
軍溝。舊排。捕屯。王連屯。斗山屯。洪傑小屯。八家屯。黑

朴子屯錢剛屯崔官屋基中孤山陳家十餘屯賊皆
山之役殺略人畜至二百燒燬房屋至一百二十餘
所奪獲糗糧至六百有餘制置使張佳胤乃劾奏備
禦使郎梅李日增王九貢遊擊韓元功史儒叅將奎
寬旂鼓官張棟上從大司馬張學顏議左遷郎梅
等秩二級韓元功等一級改調王大用其三月長昂
哈不慎約土蠻入寧遠東西頃速把亥子。上言把都
兒借土蠻爲阿父大入開原鐵嶺其四月青把都亦
治兵與土蠻約以八月入遼東土蠻報曰必欲大入
遼姑俟天大雨霧晝晦然後起出遼所不意可乎其

九月土蠻馳專難。他不能營。約青把都兒。璘忽歹。大入薊鎮義院口。因止壁大寧。老河。時哈不愼。擁七百余騎行獵東北。頃之老酋婦及青把都。群言迎喜神。發自白言。舉兒克東馳專難。恰倘不浪。卽託以駝米。陰帥諸部夷。日夜裝。於是哈卜愼。猛可真。小阿卜戶。因使通事兀子來。請於馬蘭。牆子嶺。曹家寨。開撫賞。而會長昂亦至。自虹螺山。分兵至擦崖。冷口。挑林迤東。撲捉尖夜。以絕我耳目。若小阿卜戶。又以好辭款塞。請除罪。卜戶故青酋部夷也。制置使張佳胤。洞察之。不過以請賞爲緩兵計。且馬蘭。又牽制我三路。給

諫王三餘奏亦如之。請預發密薊永平年例銀十萬兩。以佐軍乏。詔可之。其三月。西虜擄臣台吉得兒。鄧台吉以兒鄧大會東虜把兔兒花大抄花。上言願竝馳舊遼陽休舍。聲欲略遼瀋。於是增長營靜遠。上榆林。十方寺會安。步兵皆一百人。居亡何。虜從上榆林堡南。張旂志鳴砲。竟從威遠鎮直犇河北。已從河北深入南泥溝鋪。因以三百餘騎捕伏劉千戶屯我師尾。其後奪獲馬三匹。橐駝一頭。虜還大營。聯絡王連諸屯。而漢亦還石山兒屯。自是偏裨塗寬喬官張棟裴永勲史儒施國臣兵及降夷勺登等一百有四

人馳救合營。虜選精兵六千騎。衝鋒傷我楊繼文等
二人馬十八匹。會大風飛砂蔽面。不可戰。竟從十方
堡南榆林堡北出邊。漢使勾登訥之行至大長山河。
去邊可六十里。遙聞西岸諸虜吹掌聲。策傳發。卽還
走上榆林堡。而以兒鄧業渡河矣。頃勾登復從十方
寺堡出塞。行大長山。逢虜騎五六十。接戰擊破之。斬
首虜一十級。奪獲馬九頭。盔甲四副。虜亦殺降夷納
哈一人。傷那亥大等二人。漢馬死者四匹。其四月。土
蠻大會東虜。皆携小穹廬。并有奶騾馬乳牛。聲欲入
廣寧錦義。由此塞上藉藉。或言土蠻罕。一克委正。一

克打來罕。提十萬餘騎。治兵尺納哈氣兒。喀廣寧東。西。或言聚二萬餘騎。喀寧遠。山海。或言土蠻把漢委。正喀寧遠。或言治兵捨刺塔林。喀遼陽。以積怨深也。居亡何。虜騎果入十方寺。不克去。長勝堡。又不克去。靜遠堡。又不克去。上榆林堡。是時御史陳登雲方閱視。嚴燧火。卽以一月四入。無寸草。爲虜利者。久之。瓜兒兔黃太舟。倚克打刺漢。會舊開原。而把兔兒花大。抄花同西虜。以兒鄧。捨臣台吉。五路男哥兒。欲入計。來兔十方寺。而土蠻打刺漢。黃台吉。又欲大入開原。鐵嶺。瀋陽。合從而起。計不返顧。而邊備亦已日固。至

八月土蠻使部夷鱗戶百戶欲入界嶺與諸部夷謀之。或又稱薊門兵將所聚不可入。土蠻乃好謂曰。界嶺必不可入。盍不從廣寧入乎。又九月。土蠻益徵諸專略廣寧及遼瀋爲務。有夷中鐵匠煖太走漢營告漢。亦分謀靜遠。榆林長山間知其路必在瀋頃。虜夷六萬直擣懿路。以漢兵追逐還走。後從上堡北空之方寺南空復入順邊。竟擊破洮河懿路二城。旋出騎。是後洮河懿路。備益堅固。居亡何。虜復以二千餘十窺堡。遊擊將軍查大受引兵鏖戰。虜皆走。殷家屯塞我兵五千騎。列陣新堡城下。虜見兵盛不利。皆還騎。

會老營居一二日。虜會五萬騎圍汎河城。我師大戰數十合。破之。多所捕斬。而以虜勢重大。不及取首級。上莫府。虜皆以鈎鎗得屍。負載而去。汎河平行。可列馬步濠塹尤深。帆檣稠密。虜疑其下有伏。不敢至。至東門中軍張良棟把總張治守之。不可下。竟被金瘡。死。虜廼直薄南門。把總陸尚學殊死戰。勝亦如之。虜乃自宋家泊出塞。明年二月。東虜一克。灰正把漢灰正。土墨台豬把兔兒抄花。花大老思卜兒亥約土蠻男孛彥伯彥兔燒花十萬騎。馳遼陽邊外。挾賞賞且曰。如禮則已。不然者。以十萬騎檣若塞。不得耕種。是

時東虜方獲牛羊糧米及皮張氈片屯阿亥塢而塞上卒或言西虜青把都及滿都不賴欲入遼東伯洪大及東虜麟戶伯戶欲入寧遠甚有聲適虜騎五十從正寧堡入擊臺兵殺一人略馬二匹驢二頭旋出塞漢因使降夷乃六我父出鎮靖堡往謀之行至孛羅嶺逢夷哈亥率其弟若妻來降具以實告於是制置使王一鶚臺御史顧養謙總戎李成梁大會庭中議計莫若先伐其謀而會成梁有風火恙出萬死不顧生竟興疾從鎮邊堡出塞行二百餘里道逢虜於可可毋林大戰我兵鎗矢火箭火砲並發自辰至未

毋倦。虜披靡四散走。我追至穹廬。擊破之。斬首虜九百有二級。降夷乃六。奴木賴視之。中有酋長虎兒處把都等二十四級。奪獲被鹵漢人二十九人。幼夷七十八人。胡馬一千三百餘匹。駱駝盔甲器械動以百數。我兵死者僅三十餘人。越四日。班師入城。大雨如注。三軍舉手相賀。此天爲洗兵矣。給諫顧九思奏以爲奇功足嘉。始大將軍提兵取鎮邊堡間道出虜西北。撓其後。晝則捕伏山谷間。不敢火食。食乾餼飲水。夜則疾馳。用副總戎李平胡。李得全。帥降夷四十餘騎。先驅導軍。故得趨便宜。無失道。如是者凡二晝夜。

二日之內。大風雷鳴。飛砂石。蔽天。卽人馬囂塵不能辨。故機不先露。而我兵得近。及虜覺而迎敵。我兵已橫絕之矣。是日風恬日朗。虜無遁形。虜甚急。矢發如雨。士馬死傷。而我兵愈奮。爭爲先鋒。虜以爲有神也。頃之。屬御史王國弼訪誅納。旣乘傳到廣寧。卽偕備兵使任天祚按驗。與兩臺所奏同。大司馬嚴清宣捷祭告。郊廟皆如故。上賜李成梁。廕男秩遷三級。王一鶚遷御史右丞。視右司馬事。顧養謙亦御史右丞。金錢幣帛皆有差。遷任天祚一級。趙三聘奉一級。遷楊燮署都督僉事。陞李寧。李與。查大受。孫守謙。秩

視副總戎姚大節。劉崇正官如故。陞奎寬一級。王絨俸一級。金皆十五兩。傅霖准以原官調用。葉夢熊金十兩。高良弼八兩。宿振武五兩。發馬價五千。以犒軍士有功者。本兵調度有功。賜張佳胤石星金幣有差。郎中皆十兩。它一切五兩。其三月土蠻偕一措委正。把兔十餘萬騎。皆帶牛羊騾馬。欲深入廣寧東西。是時東虜銀燃聚兵三萬。腦毛大皆牽戰馬。及騷達子。打刺漢并皆欲入廣寧。打刺漢廼使龍兔伯言略開原。鐵嶺。大氏土蠻欲以廣寧請比宣府。張家口。開馬市。而炒花把兔兒花大老思卜兒愛則又大曾以兒

鄧入遼瀋。哈刺把憐入開原。紛紛藉藉。毋寧日。其明年正月。漢使降夷。乃六等四十七人。從鎮虜堡出哨。行至硃砂埧。去邊三百餘里。逢虜騎三十有奇。接戰。擊破之。斬首虜七級。餘遁走。乃六亦從新寺兒山入塞。居頃之。虜騎二千。直薄東昌堡。流沙溝。會冰坎。傾馬。馬多站立河北岸。於是先鋒三百騎。馳迤西新舖臺。大路去邊七里。殺我黃欽等一十八人。燒草房五十五所。鹵男婦八人。古大相提兵接戰。斬首虜一級。全獲馬四匹。虜亦殺我軍趙要及溪馬七騎。鹵三人。驢牛八頭。其二月。虜騎千餘。從西平堡平山臺入。千

餘捕伏邊外。分六十餘騎從鎮寧堡。張茂臺潛入盤山驛三里橋。迤東略婦女四口而去。於是臺御史顧養謙帥成梁以兵截其歸路。李平胡等卽引百金之士二千五百人從鎮遠堡樣臺西空出塞。馳東遼河去邊已九十餘里矣。虜迎戰大敗。我兵斬首捕虜凡三十七級。奪獲馬五十騎。被鹵婦女四口。我兵亡李繼祖一人。傷官兵馮文用等一十九人。漢馬死者一百九十一匹。其四月土蠻黑石炭銀燈把漢打來罕一措委正大入廣寧東西塞。而東虜把兔兒上言顧老撒卜兒愛煖兔伯言兒皆馳三岔河迤西沙嶺高

平。大小黑山居頃之。虜騎萬餘。從邢百戶大臺。至東蓮子湖。東空臺。臺空。寇拆牆口七十餘所。於是分五千騎。犇鎮武堡。東西門五千騎。奔堡東大臺。老鴉莊臺。寇墻而入。遊擊將軍劉崇正。衝鋒益疾力。自辰至未。會平洋。西平。西寧。偏裨塗寬。塗廣。胡尚忠。楊紹先等。馳救。虜廼半度河還歸。半欲往南面。深入見湖泊泥濘。而正兵營兵。又從西至盤山驛。止壁。悉勒馬盡出邊。我兵死黃相等一十六人。行人六人。傷李敏等二十九人。漢馬死者一十五匹。鹵三十四匹。漢人陳來子等一十三人。馬牛驢羸一十七頭。焚車五輛。漢

僅獲胡馬六騎。是後降夷我父等。復從鎮安堡出哨。至莫艾兔。去邊四十餘里。虜以十餘騎接戰。我父斬首一級。奪胡馬二騎。而還。阿卜當。李得功等。四十三人。亦從平虜堡出哨。至長山。去邊可八十餘里。乘夜黑。奪獲馬二百二十匹。小駒二十二匹。其五月。降夷阿卜當。及蒼頭軍。楊萬里等。從長勇堡出邊。馳中遼河。去邊可一百餘里。遇虜騎百數。北走。阿卜當忽從中起。鏖戰。生獲海廝得一人。奪獲馬五騎。牛一十二頭。虜亦殺降夷一人。傷我兵王友功三人。漢馬死者五匹。先是。把兔兒帥百十餘輩。捕伏溝中。欲入清細。

河。儼禦高良弼。即使降夷蕭漢卜向花。我父羊羔兒等七十五人。從太平堡暮山營臺馳古勒半巴林去。邊可二百五十餘里。虜方以三十騎擺撥架梁。遙見漢兵皆鑽林走如蜚。我兵亦斬首一級。奪獲馬一百五十八匹。漢馬死者九匹。是時黑字羅之子託力。爲劉國威所斬矣。託力一名把兔莽機。蓋胡中所稱巨酋。與速把亥爲顏行級乃大如斗乎。其後二年庚寅秋十月。土蠻族弟土墨台豬使夷使藉兵西虜。青把都哈不慎。以爲吾已聚兵六萬。幸爲我更治四萬。姑族長昂獐兔至。卽當大舉。時往來者言。青把都男扯

稱阿亥。及哈不慎。莽兀素班不來沙。已至長昂營矣。
制置使張國彥。臺御史郝杰。以爲殊不然。青把都。住
牧插漢。我不根。方互市。張家口。夙號忠順。曩以十月。
祭先人冢。常東行。柰何助土蠻爲亂乎。久之。寧前錦
義外邊諸虜酋。旂鼓相望。結轍於道。我偏裨李寧。相
朝。翠章應選等。十道竝出。分部土河舖。及威寧營。右
屯衛。大凌河。戚家堡。牽馬嶺。十三山站。撫順所。會安
堡。東州堡。鞍山驛。閭陽鎮。松山店。小凌河。海州城。甜
水站。黃河堡。青台峪。臺御史。及大將軍。李成梁。軍居
中。虜竟從長勇堡。山河臺。深入鞍山驛。甘泉舖。休舍。

分遣精兵攻我海州北關。成梁追逐急。廼由海州迤東。殺略東山間。副總戎李寧兵至牛心山。逢虜騎擊破之。斬首七級。栢朝翠斬首二級。奪獲馬三十餘騎。盔甲二十餘副。餘黨悉引騎竝出塞。先是。上以御史胡克儉奏有。詔詔大司馬王一鶚傳與督撫分部將領迎敵截殺。毋得逗遛觀望。致悞軍機。以故制置使張國彥。廼以書仰慰。宸衷自是之後。土蠻老而厭兵。邊患稍戢。久之以狗馬病死。子卜言台周嗣。土蠻或名土蠻罕。或名土買罕。或名察罕兒。或名插漢兒。土蠻生八子。長卜言台周。次宰桑兀兒。次伯言。

戶兒次把哈委正。次額參。次先銀。次燒花。又言生四子。長上彥伯吉。次栢太。次上彥兔。始捧捶崖之役。其娣執土蠻手流涕。戒毋復犯薊。今犯薊者數矣。及死。以花桑峪之恥未雪。猶曰吾甚媿市事未成。反不若俺答子孫得長王胡中。歲時佩黃金印。兩肘間大如斗也。

讚曰

蠻夷猾夏。豈蔓延至今乎。何其興之久也。土蠻故胡元苗裔。又俺答君長意中獨戀戀貢市事。二十餘年。廼卒不可得。老死矣。假令不殺上郡吏卒。卽縛速把

亥。黑石炭等款塞。如俺答獻趙全故事。卽予之以市。亦無不可者。而廼欲以兵要挾我。我誰從哉。禍福無門。唯人所召。土蠻始入遼。終入薊。實西虜三衛實導之。皆於土蠻亡益。日底滅亡。善哉乎。王御史之言曰。異時大可慮者。終西虜。非東虜也。

土蠻列傳下

終

卜言台周宰賽兀兒黃台吉額參列傳

卜言台周土蠻長男也。甲戌冬杪常與打來漢速把亥黑石炭黃台吉治兵插漢腦兒約曰吾騎馬入廣寧塞如河凍不可入。入河東灣弓而馳矢無虛矣。明年正月自虹螺山馳遼陽舊城邊吏見爲虜勢倥偬亟請於臺御史張學顏大將軍李成梁卽提兵出鎮遠堡以叅將馬文龍把總王大璋潘燾爲左將軍遊擊王咨禹把總劉崇正劉希武爲右將軍成梁與把總蔣位高雲衢軍居中爲三道並入匈奴營行至遼河迤西去邊可二百七十里望見卜言台周獵其西。

黑石炭震其東。我兵並直前。就營搏戰。攻之。虜自度
戰不能與漢兵。遂馳歸大營。成梁躬帥三軍追逐。虜
反戈接戰。會風沙起。障天寒甚。卒之憊。指者什二三。
皆奮死不顧生。用鎗砲擊打甚急。虜大敗。遂逃。沿山
鑽林。斬白牙兒。額兒忒等首四十三級。奪獲馬五十
八騎。盔二十九頂。甲二十一副。漢馬死者一十七騎。
三軍皆凱歌。從西興堡入塞。旦日日出。即移師東指。
行間。逢副總戎楊騰言。虜已入塞。見塞上烽候頗精。
虜皆偃旂而走。成梁度虜入關。秋毫無犯。勢不能自
忍。必復入。入則先出高平。乃移太僕少卿楊愈茂。分

守使翟繡裳趨備胡。頃之。虜騎果薄廣寧塞。漢出兵
鏖之。多所斬獲。卽日馳還。已移壁南鄉海州。東鄉遼
陽。復從長勇堡。及馬鞍山。兩空入。分馳的山。扣舖。虎
皮驛。於是成梁帥偏裨李一惟。蘇國賦。列左右軍。亦
如之。并走煙臺。我師衝鋒斬逼盡。發戰車火器。虜畏
甚。唯求得死屍。鈎馱而去。又以五十騎爲誘兵。千總
王好善從間道追至楊家寨。胡騎五千卒從中起。發
鳴鑼。竟中好善死於野。是夜漢亦使車營砲手數十
輩各持鎗砲。乘虜營瞋睡。鳴砲如雷。虜大驚。懾魄。卽
起營往西北走。而遊擊趙應昌。姚大節。及叅將王永

祐從南往北馳。叅將曹鑑郭夢徵及僉禦王國瑞張志遜楊謙黃都馮文弼孔東儒從北往南馳。遊擊王惟屏丁倣從東往西馳。虜以精兵殿後。走如脫兔。我師竟追北。斬首捕虜凡一十二級。奪獲馬三十五騎。虜亦以伏弩射死我官兵王好善與李炳等。凡一十五人。傷凡七十九人。馬死凡九十餘騎。八月。上首與速把亥坤肚兒哈黑石炭委正黃台吉。以兒鄧長兔煖兔扯勞亥大言欲入河東。開原遼陽瀋陽塞。給諫裴應章奏及未然爲備。十一月。上言台周黃台吉黑石炭以兒鄧堵刺兒煖兔拱兔會速把亥炒花堵勞

亥。大入瀋陽。海蓋已欲奪廣寧關門。大將軍李成梁提偏裨宋承恩。夏尚忠。楊子隆。朱文瀚。彭國珍。郎國忠。兵行至盤山。以諸兵爲先鋒。因與叅將郭夢徵。馳張繼先屯虜騎已從平虜堡南靜九臺入矣。我兵殊疾力戰。破之。斬勺茶戶。哈收勤。把安大。把兒孫。孛噓。銷合兒等首。大率二百有七級。奪獲橐它馬牛羊器械。亾筭。語在炒花傳。居二三年。已卯秋。卜言台周宰賽兀兒。治弓矢諸鬪器。入廣寧。錦義先是雨雪久。馬牛多瘦死。乏食。以故欲略糗糧甚急也。大將李成梁。哨至歪頭塢溝。虜騎已從獐驛站墩而入。遊擊將軍

王守道把總王景魁追逐斬捕甚多。居亾何土蠻欲北宣大請馬市。於是卜言台周宰賽兀兒大會黑石炭。大小委正等。遂度黃河。馳邢林。去廣寧三日矣。有如市不可得。請以數十萬騎。大入廣寧塞。寧乏金緡秣藁乎。臺臣王一鶚。梁夢龍。堅不可許。其十月。引胡騎五萬。從捨喇母林開營。聲欲直走寧遠。漢使調之行間。逢夷婦孫。言東虜已至土列根。撥刺兔矣。鮮車怒馬。欲以一日而橫行乎黃土嶺。一片石。不則山海中前所頗有狀。不廼欺也。居頃之。謀者又言虜至敖木林。已復屯燕河路。臺御史張夢鯉見爲敖木林。去

七力家

崇功以告。制置使吳玠使備禦史高良弼譙諭卜言。台周示以生活丹青之信。曰。將軍令若等還我所。鹵略軍民。軍民有一不幸。客死。許若執夷酋獻漢。請贖死罪。然後開市。其後癸未春。卜酋乃大會黃台吉。以兒鄧等欲入遼瀋。海州。廣寧。迤西。是時阿台及逞仰二奴並發難。至棘。制置使周詠。臺御史李松乃因郵置以聞。居頃之。卜言台周偕青把都。大小委正。耿華兒以克。反青等馳黃河迤北。而會花大抄花把兔兒。老撒卜兒愛。卜言顧等引其衆西欲攻遼河。因爲約曰。所不如期上馬。罰酋長馬一百騎。橐它五十。部落

馬二騎。牛四頭。其明年春。土蠻引卜言台周黃台吉。大會以兒鄧青把都土妹。扯臣大小委正。及青莽古素台吉塔塔兒伯戶莽惠拱兔煖兔焚兔逞把都及五路男扯勞亥與把兔兒花大抄花老撒卜兒亥治兵養善木。並寇遼海諸郡。明年春。伯彥太主連四萬餘騎。寇鈔寧遠。取糗糧一千石以上。頃之。又引一克委正二萬騎。入開原諸郡。其明年冬。卜酋將七萬騎屯老河。遂侵遼陽。其明年十月。胡中傳言遼左城垣傾頽數十丈。速把亥男把兔兒土蠻男卜彥卜言台周乃欲窺隙而起。大會東虜把漢大成及西虜哈不

慎打來明暗謀入遼左爲寇。是時黑石炭把漢大成一克大成。一克委正滾兎土妹銀燈亦治兵揷刺母林謀欲入廣寧。錦義二郡約分爲二道。卜言台周入錦義。他台兒入廣寧。於是分巡使鮑希顏輒以狀請於臺御史顧養謙。乃遣副將軍李平胡將胡鸞。李繼武。蔣國泰兵八百人出閭陽。李寧將李尚仁兵六百。人出十三。李興將金尚禮。閆爭坐兵一千二百人出右屯城。查大受將朱文翰。熊鑰兵八百人出大小凌河。遊擊將軍胡尚忠將郎顯忠兵六百人出松杏山。李應時將宋國賢兵二百人出晉鰲屯。張世爵將史

儒。張國忠。兵出錦州。唐伯美。將熊朝臣。張玉。兵五百人。出戚家堡。秦得貴。將陳文德。鐵邦彥。兵二百人。出鎮遠堡。詹鞠養。將高仲先。兵二百人。出鎮寧堡。俞成功。將佟元相。兵四百。出中安堡。而又遣把總尚傑。將一百人。出大靜堡。魯友時。將二百人。出鎮夷堡。卞世祥。將三百人。出鎮邊堡。劉可學。將二百人。出牽馬嶺。大將軍李成梁軍。居廣寧中。胡騎果馳黃佃子。黑松林。平山。青山。止壁。去邊可二十餘里。謀者望見胡騎十餘萬。列營闊五十。長九十。烽火通於廣寧。錦義乃分五萬騎。從鎮夷堡大邊。下韓口。沙河營。入五萬騎。

從白土溝入。謀欲鈔掠郡界。漢出兵逐擊。千弩俱發。虜皆應弦而倒。由此引其衆出塞。居頃之。虜復寇大清堡。備禦使李都發兵與擊。斬一人。虜馬一騎。匈奴始南軍進退稍引去。去頭山寺兒溝。自是之後。臺御史顧養謙見爲虜營旁近鎮夷堡。發三將軍屯盤嶺。率馬嶺以備之。虜竟從二嶺入。捕殺吏卒。毆侵城堡。漢發兵擊大破之。語在把兔兒傳。其後庚寅春。卜言台周引黃台吉大小委正等入遼瀋開原。海蓋諸郡寇鈔百姓。制置使張國彥劾奏副總戎姚大節有狀。先是大將軍李成梁發車騎詣虜營。虜不敢南下。各

鳥獸散已。追逐至河北。再抵雕背山。去邊已百餘里。擊破之。斬首虜二百八十級。酋長十三人。奸細四人。奪獲胡馬器械。動以千數。是歲也。賜李成梁祿米五十石。廕子李如禎。列堂上。僉書管事。廕郝杰。男入太學。遷李寧都督僉事。吳希漢。李如栢。副總戎。李繼武。遊擊。加鮑希顏。山東按察使秩。視事。它皆賜金幣有差。已祭告郊廟。皆如故事。自後。給諫薛三才。稱道路傳言。言遼左多捕降者爲虜。掘死人以爲獲。請按驗首功。其後癸巳五月。十言台周。携家室至義州。外邊湯池。而以千餘騎。屬小友青拱兔台吉。并軍。軍

五千人從大定堡于果營入義州塞。於是備兵使馮時泰請於制置使顧養謙。帥遊擊將軍宿振武千把佟照王東銘出遮虜障。虜與漢軍相亂。漢兵與虜騎並馳。斬首五級。鹵獲馬十八匹。虜尤殺遊擊宿振文。中軍夏尚忠把總宿振義等二十三人。傷家丁杜梅等四十人。奪漢馬三十三匹。過當。遂乘勝走大康堡。祝青營出塞。居四五日。復從鎮安堡北。馳者久之。漢發兵追奔。亡所得而還。虜竟以二千餘騎。捕伏鎮北堡外邊。紅窰東小台。倉卒從溝中起。漢兵覺。鳴砲矢石如雨下。虜乃以其半。復捕伏堡東廟兒山。半攻城。

堡守備使孟宗孔躬帥蒼頭軍尹世武阻壕爲險。弓矢鎗砲火箭一時並發。所擊殺甚多。大率虜減什二三。是時副總戎姚大節馳三尖山遊擊安本固馳半邊山。將合營虜望見漢兵益增盛。遂解去。御史周繼翰見爲數日之間。兩鈔廣寧。至亾道輒以狀請。其十二月傳調一克灰正良燈奴木大等三萬餘騎。期上元。祥言略廣寧。遂入遼陽。其明年十月。伯彥復調一指委正把漢委正良燈腦毛大十餘萬騎。竟寇鈔廣寧東西。是時卜言台周以衆鳴把兔兒以強鳴。兩酋相得甚驩。母厭。於是連騎大入塞。扼三岔河。攻吳

家墳。大將軍董一元卷甲輕舉。長驅三千餘里。逢擊大破之。斬首虜四百餘級。奪獲橐它馬牛羊以千數。語在把兔兒傳。其十二月。上言台周擁精兵。寇鈔我右屯衛。天誘其衷。伯言兒及扯拜授首。伯言兒即黃台州。而扯拜故一克委正也。伯言兒最驍勇。知兵。虜每出戰。悉聽伯言兒所調度。常以市賞故。各姓數奉御覽。是時上言台周如失左右手。殊飲恨。乃與把兔兒得革力台吉打刺漢小歹青良燈一克大成謀。謀欲以正月寇廣寧寧前錦義諸郡。以報鎮武之耻。而會把兔兒被金瘡竟死。猶豫未發。制置使孫鑛

與大將軍董一元議守河東。故抄花煖兔巢也。今伯言兒把兔兒。後先蚤天。虜營方擾亂。可襲而取。卽以二月將兵從龍灣。至十方寺。汰其老弱三千。留居塞下。遙爲聲勢。是夜。以叅議使楊高。監軍大方伯郭性之。叅政使梁雲龍。叅議使王邦俊。給餉不乏。絕直抵黑山。旦日天大雪。深數尺。一元引偏將高策等。冒雪而前。日夜裝至拴道。去塞四百餘里。忽日晴明。襲虜營。破之。得其酋長卜勒亥。汪那呵。及首虜百九級。捕得生口十人。奪獲馬五十八騎。我兵亡七人。傷三十人。漢馬死者五十一匹。於是制置使孫鑛大會臺

御史李化龍以捷聞。上詔加孫鑛、李化龍、董一元、王邦俊下部紀錄。孫守廉復副總戎秩視遊擊事。它皆賜金幣有差。卜言台周或名卜彥伯或名卜言台仕或名伯彥太主或名撥言太主或名卜言台主先是平虜堡奪獲橐它二百餘騎傳致京營每騎予價十金悉以佐所司戎馬費。臺御史李化龍請得著爲令以鎮武獲橐它至九百有二十四騎也。議欲以五百備役路馬賈亦如之。它悉以付騎乘。上留二十騎供均圉之用。京營於是列胡馬矣。

宰賽兀兒土蠻次子也。又名栢大甲。午夏東虜炒花。

把都兒卜言顧脫合赤老撒卜羅愛帥六千餘騎。治臨衝謀欲寇鈔我正安堡。雙臺大小黑山。當是時宰賽兀兒始臨兵。業與西虜合營矣。先是土蠻卜言台周數爲邊害。廣寧錦義尤甚。宰賽兀兒亦欲新入是郡也。知遼河西涯美水草。乃結聯諸胡騎於其下。而會夜月明。宰賽兀兒以爲稱兵不便。遲望後天黑夜。縋而出。遂入錦義。顧不愉快耶。時宰賽之衆漸至萬騎。皆移壁黑山綿塔。尅期斬關。會西夷捨具以實告於大將軍。尤繼先發五將軍。軍數千人出擊胡。大將及巡使部署諸將張旂志。砲聲震野。虜方以二千騎。

從莽撞湖。直搗李高麗。略取軍民。於是寧前兵使大會諸將下令。令軍中毋逗遛。毋下馬爭級。三軍受令。鼓行而前。與虜大戰一日。破之。得甲首一十八級。奪獲漢人一百七十六人。馬八十四騎。牛騾二百二十三頭。漢亦亡把總李世功。李守仁。百戶張國副。謝繼武。與軍士尤熊。龍虎等四十六人。傷尤彪等四十八人。漢馬死者五十三匹。虜乃從野猪湖出塞。始虜敗時。我師斬虜獲生。大有功。虜衆大亂。自相衝殺。恐漢兵追欲屠之也。皆雉兔逃。至堡南三里。相鄉哭。失聲與尸而去。

黃台吉。別名小黃台吉。土蠻侄也。甲戌冬。卜言台周與打來漢速把亥輩。治兵插漢腦兒。時黃台吉引其衆盡從諸酋。明年秋。黃台吉遂爲酋長。於是黑石炭卜言台周以兒鄧堵刺兒煖兔拱兔大會速把亥炒花。搶勞亥謀欲入瀋陽海蓋諸郡。久之。胡騎從虹螺山直走舊遼陽城南。旁塞獵以誘我兵。語在炒花卜言台周傳。其冬。黃台吉同土蠻從古城堡小關門入。叅將郭夢徵提兵至劉指揮屯。虜方分道而馳。見漢兵盛。盡走出塞。頃之。復從開原城東大入塞。分爲三營。一營營團山屯。一營營靖安松山堡。一營散四野。

行劫略。是夜止壁王貴屯。旦日攻城。城中矢石如雨。擊傷甚多。遂解去。其明年秋。黃台吉及速把亥。炒花哈屯。委正。反青。堵刺兒。莽忽大。董狐狸。長昂。長兎。大入全遼。於是副總戎曹簠出瀋陽。叅將姚大節出虎皮驛。遊擊徐永昌出武靖營。徐國輔出錦州。王大璋出寧前。守備凌雲出奉集堡。千總郎梅出鎮夷堡。劉登泰出中前所。虜益環繞我東塞。阻絕市夷。及譯長從寧前。歷錦義廣寧。遼瀋。至開原。道路不通。低徊者久之。邊備嚴。弗入。稍引去。去鈔王台塞。已度漢兵解嚴。窺隙入開原。開原烽火墩望甚盛。復西徙。而不敢

東向。虜旣見東隅弗可入。因詳示北遂。以緩我兵。旦日乘監門或不意。倉卒入威遠堡。備如開原。矢石所擊。傷甚衆。皆遁走。先是土蠻有女。皎好。黃台吉爲其子求婚。大言若許我。卽以金繒貂裘。馬牛羊送若。若不許。請得以橫磨劒刃若塞。土蠻恐啓釁。竟許之。是日刑白馬以盟。遂送土蠻牛馬五十頭。羊二百角。甲一副。土蠻亦致通袖襖十襲。貂豹皮襖三副。藍白布三疋。盛甲二副。已乃戒之曰。旣與阿塞有百年之雅。自今開原塞。不得動一草一木。明年四月。黃台吉帥諸部往海西行親迎禮。如漢。是時塞下傳謂入寇。或

言青把都往鈔朱赤達子。語在給諫蔡汝賢疏。於是開原之外其從如雲也。

額參或亦云土蠻子也。丁丑夏與土蠻及委正黃台吉。那言禿捨起台吉。拱兔。以兒鄧。五路等擁五萬餘騎馳緊水河。聲欲寇東西塞。時土蠻爲主而額參益彊。庚辰之寇錦義也。參爲先鋒引十萬騎至古北路會我大將軍李成梁備邊。乃引去。甲申夏參以堵刺兒起復引千騎應堵酋之召。于是錦義告倣。明年夏又偕栢彥務勺里兔謀欲寇我廣寧當路塞。其秋參又結連以兒鄧黃台吉委正以克反青拱兔阿民台。

吉煖兔哥兒大鈔我沙嶺我師多所斬獲自後腦毛大及一克委正把漢委正復發難參皆與俱李羅胡吉兒爲左右我裨將李平胡往擊之斬首虜凡二百四十有七級奪獲馬三百匹語在灰正及滾兔傳李羅胡吉兒去邊可三百餘里一戰而走由備之嚴也

讚曰

土蠻之子數人而卜言台周及宰賽兀兒乃獨倔強李彥炒花碌碌因人成事不足論獨兩酋不能匡父于正及父死猶與西虜距漢結婚王台大入小入歲爲邊患而竟得全首領此豈無天道哉謀之不臧則

武力錄

八領參列傳

十三

乙、九十五

責市責也

土壘台豬列傳

土壘台豬。土蠻族弟也。土蠻諸部。夙與東夷不睦。而所與相扇起者。往往多借勢于西虜。擁衆數十萬。東西逐我水草。兩河之間。不得解甲。丙戌之役。台豬與一克灰正。把漢灰正。携牛羊糗糒。及皮張氊片而至。其爲說。挾土蠻以擾邊鄙。阻我耕牧。我因而許開市。視宣大諸酋如快。而制置使王一鶚。念萬世大計。寧大戰終弗許。諸虜得比宣大事。當土酋之治兵。毋林也。我遼陽將軍楊燮。寬奠將軍王維真。海州將軍李宗召。寧遠將軍劉登泰。中後將軍祖承訓。長奠將軍

王紹芳。亦合兵。溝河西。會土蠻未至。台豬先遣參騎

馳野豬湖。合把禿兒。抄花花大老思。卜兒亥之衆。固已八萬。於是臺御史顧養謙。恐土蠻至而黨益盛。乃大會大將軍李成梁。決筴伐謀。亟徵諸兵赴會。於是義州將軍黑雲龍。鎮武將軍佟養正。正安將軍李維藩。錦州將軍李文芹。如期四集。陣類一字。以大將軍軍居中。出邊直擣虜巢。行至可可母林。去邊已二百餘里。道逢虜。大戰數十合。擊破之。斬首捕虜凡九百有。二級。奪獲馬牛羊。它駝千餘。數。厯甲器械。亾筭。居頃之。上幸從給諫顧九思議。乃遣御史王國弼。按

驗首虜果如莫府所上乃賜爵賞有差語在土蠻
及一克灰正傳庚寅台豬復借兵于青把都青把都
以長昂未至爲辭至則先往入寇不利至八月土蠻
亦藉衆酋而起待新月上後馳兩河向無土蠻則台
豬輒敗兵家伐交之議正此類也

讚曰

今甲以出塞爲生事撲殺爲啓釁然律于虜衰之時
則計專于守今虜勢方張必按成法以繩將士則可
可毋林之戰獨非出塞之虜患正以文皇
北伐之後不復出塞故虜騎敢于南牧以戰爲守政

惠其出塞之不遠也封狼居胥之想諸將勉之

滾兔灰正一克灰正腦毛大堵刺兒小反青列傳

滾兔土蠻部夷也隆慶末常與腦毛大董狐狸治兵鈔寧前已與董狐狸卜言兀灰正把都兒都刺兒黑石炭侵苦我守障吏於是大將軍李成梁搏戰於亂岡轉鬪至雙墩堡虜大敗進薄雙河城叅將楊騰疾力戰破之自是之後數窘辱部夷討孫不賴討孫不賴因牽馬牛羊亾抵於青把都是時那莫大亦被困欲亾去滾兔乃大會把都兒卽引萬餘騎追至五兔牛臺御史陳道基得其狀見爲五兔牛去馬蘭峪黃

崖口百餘里西南可入黃崖口將軍石關西可入墻
子嶺南可入馬蘭峪大安口乃遣總戎戚繼光出寬
奠副總戎白福出松棚董一元出墻子嶺叅將張爓
出將軍石關遊擊李信出黃崖營協守史震出鮎魚
石關李如楨出曹家寨賴邊備至悉得不入其明年
春正月滾兔竟引兵從大定堡西北走漢使裨將胡
栾備大康兵虜因走中寺兒臺遂入塞略樵夫王大
汗等七人殺馬一騎栾卽擁精兵追至賚福驛去邊
六十里與虜接戰斬首虜四級奪獲馬六騎及所略
漢人餘皆引去我兵傷王儒等一十三人馬十七匹

乘復使諜者出大茂堡詞之。旣還，至色樹嶺道，逢虜四騎，執一人，斬其首而去。四月，虜騎千餘馳惡木林，群行獵，欲謀入前屯。頃之，從永安堡小川臺東空入，裨將石太柱、張國維大戰數十合，虜弗敵，遁走。遊擊楊紹勲度虜不得志，鞅鞅去，必復增兵大入塞，乃使備禦張應選捕伏背陰障堡，而虜騎三百果分爲二部：一部馳永安堡，一部馳河口臺。漢出兵追犇擊，破之，斬首七級，餘黨悉走小川。逢應選兵，斬首虜一級。我官兵傷楊得功等一十二人，漢馬死者一十三匹。而會紹勲及吳進忠、弄璋兵亦追至前屯，迤西長山。

虜望見漢兵盛不可敵。遂引去。於是制置使梁夢龍、
臺御史周詠具以狀聞。自是之後，滾兔與長昂歸正
合營。倉卒寇中前所見漢兵，乘邊守塞甚精明，遂解
去。是歲萬曆壬午也。其後甲申，滾兔與一克大逞把
漢大逞復聚五千餘騎屯兀魯班。蘇刺哈欲寇鈔遼
左。明年三月，與腦毛大鈔寧遠。其明年冬，滾兔復欲
寇廣寧迤東西。先是胡騎入錦州，秋毫無所得。以故
虜益藉藉。亡寧日，居有頃，胡騎三千從大興堡三道
溝入。我大將李成梁馳閱陽驛，遣叅將李寧備塔山。
千戶鄒應龍備高橋及古山。叅將李維藩兵亦至。合

營。滾兔畏漢兵盛。力弗當。引衆出塞。明年聚十萬騎。自捨刺母林。分略廣寧。錦義。語在卜言台。周傳後辛卯。速把亥。復使滾兔。腦毛。大一克。委正把漢。委正等。聚兵捏留屯。而東虜額參。委正。以克及青耿革兒台吉。小及青拱兔台吉。亦並欲略廣寧。錦義。謀者亟以狀請。閏三月。會胡馬方贏。餒。制置使蹇達。欲先發以制之。使偏裨李平胡。李寧等。擁精兵數千人。從鎮虜台出塞。越二日。至李羅胡吉兒道。逢虜去邊已三百餘矣。與虜騎接戰。自午至酉。虜相引遁去。我師尾其後。旦日。復戰至酉。我師大捷。斬首虜凡二百四十二。

級奪獲漢人一口馬三百騎。盔甲器械以百數。我裨將亡者梁朝等三人。軍崔鸞等一百九十六人。馬九百七十五匹。明年冬以兒鄧大會哈奈歹青卜合惱顏烏龍大哈刺哈五路委板城上合諸營。皆縫口袋。期明年上馬鈔廣寧。而是時火彥竿良燈黑石得黑。籌大成抽戶更根兒燒大成。方治盔甲及鈎竿斧子。曰吾以新歲入廣寧塞可乎。時甲午正月也。於是制置使楊紹勳大會臺御史韓取善並乘傳移廣寧中。以羽檄徵塞上兵如林而至。夫滾兔甘就撫實稱薊門藩籬。一旦爲虜鄉導。狂逞至此。安用款爲。

灰正。又名炭正。隆慶末。土蠻之發難也。而灰正及卜言兀把都兒都刺兒滾兒黑石炭董狐狸猶爲小酋長。帶甲一萬。並聚捨喇母林。日夜治裝。以橐佗載鐵木鈎杆。芻芟乾餼。或鈔錦義。或鈔寧遠。皆爲我謀者。所覺。具狀以告。胡騎果從高臺堡入。分爲三營。一營馳沙河驛。一營馳迤東。一營馳雙墩舖。於是叅將楊爕引兵出亂岡臺。逢戰。捕斬甚多。而遊擊將軍李惟一兵亦馳至。合營虜復挑戰。我戰車如雲。弓矢如雨。虜度不可敵。亟奔圍沙河驛。大將軍李成梁先已遣偏裨李元善于慶捕伏驛下。并皆僉卒起。虜始棄鈎

杆而去。備禦使葛景岳追亡逐北至老衝以火器擊殺甚多。虜皆鈞馱其屍遂引去。先是胡騎寇黑莊窠殺備堡者將劉雲登而會備兵使李松行部至高臺堡止傳舍聞之大驚。叅將楊燮卽以爲郊迎官逢虜使使者謂之乃虜騎深入王乃溝登廼直追奔不幸中流矢死。旦日虜鈔東關驛略騾五頭頃之從河灣臺入關乃殺一人略騾五頭驢一頭虜乃奔錦川營小河口出邊御史朱文科以書劾奏燮有狀明年改元土蠻及速把亥寇我開原遼陽灰正輒提兵七十人乘東塞空虛直擣我廣寧東西已馳錦義諸郡灰

正爲人多智。有膽略。每入寇。輒明目張膽。不欲襲漢。不意常與五路黃台吉。及青。聚兵鎮靖關外。使諜者張復賢。正告關吏曰。吾來欲報夙怨。請自關以內。迤東西。橫行義州大清。不使塞上禾稼生長。已卯夏。灰正引千餘騎。往佛延寺。奔鎮靖堡。掘牆而入。備守使劉崇正。出兵大戰。自己至午。擊傷頗多。皆鈎佗入虜營。不以級報。頃以百餘騎。深入渾河。遂捕伏。蓑溝。誘漢兵。不可得。遂圍攻正義小莊。焚草廬三所。於是漢兵至者。四面俱集。虜遁走。道路皆言。虜將復入。居民洶洶。其秋。果與土蠻罕他太兒打來罕。蘇把亥。聚四

萬餘騎。於好村。刑馬祭旗。欲畢。會於磔力曲禮。曰。今
茲入遼。所不如約者。罰盍甲馬牛羊。於是牽牛一頭。
羊三頭。其明年春。灰正復與土蠻打來罕。聚兵捨刺
母林。謀鈔廣寧東西。已欲鈔錦州。已又欲鈔寧遠。前
屯。以漢嘗殺胡騎六百故也。是時蘇把亥。炒花。煖兔。
伯言。以兒鄧。皆欲入瀋陽。而制置使梁夢龍。及臺御
史周詠。卽遣使者行邊。兵豫爲備。乙酉。東虜茶回兒。
短弓兒。掘起山谷間。以五萬騎大入塞。於是寇鈔我
遼陽迤西。廣寧迤東。黃泥窪。鞞城。是時良燈。亦欲爲
速把亥報怨。乃大會一克大逞。把漢。大逞。哈刺哈更。

根及東虜炒花把兔兒卜言顧花大老撒卜兒艾西
虜以兒鄧黃台吉委正以克反青額素委正拱兔台
吉阿民台吉煖兔小反青五路男哥兒並聚兵呵呵
莫林灰正因與之俱遂決筴欲鈔三岔河西沙嶺迤
南吳家墳有如泥淖不可入入錦義清細河居頃之
灰正果從艮燈及灰正把都兒一指委正把漢委正
腦毛大蟒戶百戶等三萬騎祭旗纛於搖言先使諸
虜牽馬佗負盛甲糗糒視山海迤西道東虜則那彥
伯彥打賴白洪大老沙西虜則忙金兒兀魯孩子獐
兔打來明暗哈不慎滿古賽打兒漢或近塞行獵或

問易漢服謀欲窺隙入寧遠前屯及界嶺義院口諸鎮於是制置使張佳胤臺御史顧養謙大會大將軍李成梁遣守備鄭應時出蒲河叅將查大受出汎河遊擊胡思忠出鐵嶺塗廣出撫順唐伯美出海州皆聽調度於副總戎楊爕備河東胡鸞出錦義李平胡出大小凌河備河西成梁及叅將李寧李興出右屯廣寧鎮武吳家墳軍居中備兵使任天祚與民部郎趙三聘帥廣寧倅支應瑞轉餉軍中勿乏絕是日平胡從大靜堡尖山門馳古路半那林去塞三百五十餘里捕伏聽諸虜諸虜方帥千餘騎接戰平胡疾力

擊破之。斬卜兒忒革。卜言兀捨正首。凡一百有八級。奪獲盔凡五十頂。甲凡六十一副。臂手凡三十八副。我兵僅亡阿寨一人。亦降夷也。漢兵凱旋。走大清堡。入塞。亡何漢降夷。乃路等七人。出鎮邊堡。走三塔谷。道逢把刺哈。委正部夷也。以佗負盔甲。從委正黃台吉。以兒鄧來會炒花花大。把兔兒路中生捕。以獻。是時謀欲分鈔東西邊。分守使傅霖。備兵使王緘。乃遣千總馬世龍。移長勝堡。金效葵。移奉集堡。遊擊裴永勳。移武靖營。叅將王維貞。移鞍山驛。把總羅維冕。移虎皮驛。指揮宋衛。移十方寺堡。劉嚴。移靜遠堡。千戶

楊世英移上榆林堡。黎文移長營堡。把總曹養男移蒲河城。陳九疇移會安堡。使諜者蘇文禮及莊達子分道而馳。一道走靜遠堡。一道走上榆林堡。既至大長山。去邊六十餘里。望見胡騎入瀋陽。亟舉烽鳴砲。遠近皆赴。追奔至板橋舖。胡虜六萬。業已從上榆林堡北及深入懿路。汎河鐵嶺。殺略公行。已率二千餘騎。寇會安堡。有叅將宿振武遊擊彭國珍。胡思忠副總戎楊燮。遊擊塗廣。鄭應時。馳盧野舖夾攻。多所捕斬。虜乃從汎河城出塞。於是備懿路者曰。寇我八里莊。及陳五屯。徐千戶屯。孫家小屯。金英屯。魏臺。衝張

海屯王祥屯于二漢屯遞運所屯殺十二人略馬驢
六匹燒焚室廬一百五十四所穀垛三十三堆糗糧
四十三窖備洸河者曰寇我劉志綱屯洪杰屯李千
戶屯白聰屯麻線衝屯宋家屯劉京屯蔡宣屯廬干
戶屯溫玉屯周三屯汪鑑屯殷家屯劉指揮屯殺裨
將會尚忠及男子三人略二十九人牛馬驢一十五
頭燒燬室廬一百一十七所穀垛一十八堆糗糧五
十九窖已攻門西燒燬演武廳八所棹杆一根城東
殺四人略馬驢三頭焚燬房廬一十五所葛林頭一
垛穀垛一堆糗糧二窖復攻門東弔橋有守將查大

受伏其下。大戰而退。備鐵嶺者曰。寇我馬官兒屯。陳
指揮屯李家莊。金千戶屯蕭家溝。屯舒元俊屯南塔
寺。項伸屯顧官兒屯。祁家小屯。遼海屯。糗糒芟草。鹵
掠殆盡。居頃之。虜復合謀入寇。成梁欲以先聲奪之。
卽提精兵至長勇堡。下令降夷家丁。逢虜卽殺。使彼
疑懼。卽從瀋陽上榆林堡。出塞行一百五十餘里。至
江山道。逢數十騎。鏖戰大破之。斬首虜一十五級。奪
獲盔七頂。甲七副。馬一十五騎。虜度勢孤。遂引去。
克灰正。土蠻部也。癸未冬。土蠻欲寇我山海關。而灰
正首以兵從。栗馬惡力曰。吾部五萬餘騎。今以三萬

騎闕漢關而已。二萬騎堵口子。使遼左無彈丸阻也。後一年。灰正與滾兔合。又欲寇遼東。寧遠而灰正則又慮薊兵出戰。乃遣滾兔引五百騎伏黃土嶺一片石。如漢兵至。卒從中起。漢兵進不得攻。退不得守。將必坐而自斃。明年春。灰正果與把漢台猪合三萬騎至捨刺母林。止壁期土蠻男孛彥伯彥兔煖花相與犄角。而自引兵十萬馳廣寧關下。要講市賞。計以漢不與賞。卽以十萬騎鈔漢塞。是時王一鶚爲制置使。市賞竟不可得。且大發兵出邊。從鎮邊堡行二百餘里。至可可母林。胡中望見兵來。輒相傳報。虜始披甲。

赴戰。大將軍李成梁帥士卒疾力戰。自辰至未。矢砲俱發。聲振天地。虜大敗走。成梁追奔至穹廬。大破之。斬虎兒處把禿等首。凡九百有二級。奪獲馬凡一千三百一十三騎。橐它三頭。牛一百二十七頭。盔甲器械。亾筭。使至御前宣捷祭告。郊廟如禮。詔以大司馬張佳胤議歲加李成梁祿米五十石。金錢幣帛有差。語皆在土蠻傳。是年冬。加備兵使葉夢熊秩視叅政。從臺御史蹇達。御史韓國禎請也。是後土蠻伯彥令灰正與艮燈奴木大引三萬騎寇遼陽。灰正詳言寇寧前。度漢塞不我備。然後深入遼左。此虜中

於智豈得與持重者敵哉。

腦毛大亦土蠻部夷也。居部中久。以所知名。壬申夏。始與炒蠻滾兔董狐狸從小河口圍我東關驛。叅將楊騰遊擊傅廷勲擊之。勢如席卷。盡棄鐵木鈎杆走。我兵追至碾盤山出塞。頃復聚兵東行。謀欲寇寧前。其秋聚黑石炭伯顏兀把都兒聚兵捨刺母林。諸酋趨治裝行。腦毛大曰。吾必待月老然後傳發。將入義院界嶺之間。市夷以其狀來告。制置使劉應節臺御史楊北遣遊擊將軍馬承胤備建燕大將軍戚繼光備燕河石門臺頭山海有頃。胡騎竟入黑莊窠。仙嶺

寺。是年。莊皇帝晏駕。竈安事有日矣。給諫蔡汝賢。

奏免兩臺護駕。庶得備邊。其冬。腦毛大董狐狸。益縱。

諸部旁塞行獵。微使五百騎。捕伏杏樹溝中。以誘漢。

漢兵果至。虜酋卒中起。持滿拒漢。我百戶儲朝先。及。

軍士多中流矢死。會漢兵馳救。引去。後丙子。腦毛大。

從速把亥。寇河東。已寇廣寧。錦義自後卜言台周。及。

黃台吉。克石炭。大小委正。以見鄧。煖兔拱兔。抄戶兒。

大會。女只罵火屯。亦欲寇廣寧。本腦毛大謀也。後癸。

未冬。聚兵萬餘騎。馳廣寧關下。請市。其乙酉春。與土。

蠻六萬騎。寇鈔二岔河東。遼陽迤西。及金復海蓋諸。

那頃之。從滾兔五百餘騎。小入寧遠東西。已從委正
長昂謀入寇。已從一措委正。把漢委正。合三萬餘騎。
駝負盔甲糗糧。間易漢服。視道路。語在委正傳。明年
四月。復牽牛羊至廣寧。請馬市。辭至桀驚亡道。久之。
腦毛大治兵七萬騎。止壁舊遼陽。副總姚大節。備虎
皮驛。孫守廉。備遼陽。虜果以萬騎分馳。分二千騎。從
小團山黎園。走二千騎。從塞尖山歪頭山走。三千騎。
從大定堡五能管走。三千騎。從大勝堡大尖山走。皆
外邊制置使張國彥。郵置以聞。後腦毛大與一克把
漢。更根兒大成。滾兔。並聚兵捏留兔。寇廣寧及錦義。

語在滾兔傳。腦毛大。始亦薊門撫夷也。以寇遼故。自
嬰大罪。不可赦。每至廣寧關下。自張家口市夷。竟無
復與請者。

堵刺兒與土蠻打刺罕並起。始發難時。打刺罕寇我
遼東。堵輒以三萬騎往。後從卜言兀捨勞亥寇廣寧。
錦義時董忽力渡灤河。亦鈔我羅文馬蘭。給諫張書
以忽力小酋止三百騎。而敢鼓行塞上焉。用將爲至
明年。堵復從卜言兀速把亥。黃台吉寇我錦義。則萬
曆甲戌也。明年春大會卜言台周。打來漢黑石炭。及
青委正土買罕。長兔煖兔拱兔抄忽兒六萬騎並聚。

挿漢腦兒在廣寧北。乘夜移壁海州與遼潘相鄉項之。從長勇堡高架于臺北。馬鞍山南兩空入。攻我山。扣鋪虎皮驛。李成梁發兵擊破之。擊殺甚多。皆駝負其屍。不及首級報。五月。堵與擺言兀黑石炭黃台吉萬餘騎謀寇錦義。先馳栢凌河。而會山上砲鳴。虜知有備。亟麾兵走。隨擊寧遠塔山。山城斗大孤懸而守禦有法。堅弗可下。虜中精兵善馬俱被殲焉。切齒恨曰。秋後禾登。必報此役。中夜偃旗而去。諜者聳其哭聲。數月不止。志雖必報。衆弗從也。改走舊營。延袤二十餘里。中分道。一道正西。一道西北。會大風雨。只尺

不辨虜將乘此以窺塔山。塔山備禦如故。望而膽裂。皆棄旗鼓北走。久之海州被掠。婦人李蔡自堵營入。入漢稱擺言元久物故。戒諸虜毋妄言。其大言復入塞者。實欺。謾漢。諜者陳加友從大寧來。道逢敗虜。重傷者凡數十人。皆棄置橐裝。往西南去。加友熟視橐中。得口袋。袋有鐵錘。小羊皮及皮襖四。甲包二。皮包一。加友拾歸。恐吏弗我信。亟斬諸死夷首二級。馳還。已諜者李得全從大福堡出哨。至二百里外。虜騎少者四三十。多者五六十。相望于道。而皆散漫唏噓。殊無鬪色。亦傷而未死者也。十一月黃台吉黑石炭卜。

言台周以兒鄧煖兔拱兔大會速把亥炒花椿勞亥起兵時堵刺乘衆從廣寧斬關而入我瀋陽海蓋公行殺略語在下言炒花傳其十二月與黑石炭委正土買罕長兔拱兔炒忽兒謀欲寇廣寧先使那哈乞往哈喇聚兵是時長昂不入貢者已久亦欲阻喜峯爲險屬夷以告備不得入明年冬堵與速把亥炒花哈屯委正歹青黃台吉董狐狸莽忽大長昂長兔聚兵三萬鈔全遼明年春治精兵四萬會哈不愼莽兀歹往長昂營祭兩酋因而合營堵不能自立矣或言入遼或言入山海皆以辭驕而退丙戌長昂大會堵

刺兒董狐狸打來關安凡魯孩手謀入寧前土蠻亦
會諸部寇廣寧錦義與衆誓曰不如約者罰馬十騎
橐駝一頭總以累敗之後挾衆爲勢虛聲言寇言鈔
而處處有備能不坐而斃乎

小反青堵刺兒男也庚辰秋土蠻寇我錦義反青輒
輸肝膽爲我謀焉明年秋克石炭以見鄧卜言克阿
夷首難反青又反以兵從非真能附漢者佯言曰吾
欲寇遼以欺漢胡騎竟從長安堡直奔新城渡河東
走副總戎曹鼐及鎮靖守備使劉崇正追奔可三里
許道逢虜縱精兵二千餘騎鏖戰我將校多受傷

略人民畜產甚衆。我兵止得首四級。馬二十四騎。御史于應昌以書劾奏。事下大司馬梁夢龍。請寬假臺御史。周詠分守使張崇功。大將軍李成梁罪。上從之。於是罷副總戎曹簋。遊擊張崇功。任而以備守。崔吉。吳胤祖。下御史逮問。小反青爲人柔弱。因人成事。乍順乍叛。反覆亾常。癸未。速把亥死。而卜言台周起。乃與青把都言兔。大小委正。耿華兒以克反青。大會黃台吉。拱兔卜克。扯臣獎兔。以兒鄧渡黃河迤北。往南走。時速把亥死。虜秘言之。有脫落措以告。而小反青故朵顏人。亦告卜言台周急。明年夏。反青會額叅。

委正引千餘騎寇鎮靖關。明年秋，反青與以兒鄧黃台吉、委正以克反青、拱兔台吉、阿民台吉、煖兔及五路男哥兒聚兵，呵阿莫林寇鈔我三岔沙嶺。語在灰正傳。明年冬，反青從大小委正、土妹台吉、耿革台吉、哈兒赴捨刺大青把都兒，卜言顧從外邊平山迤西黃佃子起兵，大入錦義。語在炒花傳。明年反青與卜彥太主、大小委正、土妹台吉、捨刺大台吉及炒花把都兒並壁黃佃子黑松林居。辛卯，引額參委正以克反青、耿革台吉、拱兔台吉寇我廣寧迤西。語在滾兔傳。癸巳，反青及台周五十餘騎從大定堡入義州。乙

未冬，台周鈔右屯，漢出兵破之，殺委正男，扯拜黃台。州於是反。青從卜言，台周耿革台吉打刺漢良燈，一克大成，聚三萬騎，略廣寧以報右屯之役。大將董一元大破之，斬首虜凡一百有九級，奪獲生口十人，馬牛橐駝。明年丙申，反青誨禍，款塞引旁塞諸虜，乞歸降。向因邊吏不通胡音，通事多恣巧詐，撫之則請增餉，勦之則苦鑿空，侵盜之慘，歲無虛日。時房山故令俞方策以久任寧夏，習知胡音，且馴夷性，反青每至義州求貢，輒與親盟，譯者不能設詐。方策撫以私恩，懾以漢法，虜親畏之，稱俞那顏，稱俞太師，進止

惟命當道聽爲指南而忽以計黜制使乃特疏請
白兵家使過使功不可拘以吏議今房山舊吏俞方
策才與地相宜功與過不相掩請以邊才起用居官
如故詔從之諸虜因是束手反青昔日大言所爲
誘兵伏兵分兵合兵者曾不能索一飽尊俎折衝之
說于此見之

讚曰

土蠻部以十萬數滾兔六七酋最大要之藉兵於西
虜藉耳目於三衛灰正置不論獨怪滾兔腦毛大就
賞薊門旋入遼爲寇是可撫哉反青一朶顏夷也自

以漢可欺謾日言寇鈔有兵無餼窮而乞市貢道已
絕此亦自欺嫚也